

335. *Antwort der flämischen Deputirten auf die Klageartikel der hansischen Rathsendeboten. — 1387 Jun. 17.*

L. aus der Handschrift zu Lübeck; 8 zusammengeheftete Pergamentblätter; = 2, Nr. 344.

31 b. Item ten poynte mencioen makende van schepengoede ghenomen bi Clayse van Campen, Heine Starke ende Heine Clinken etc., verandwoord die voors[creven] Heyn Starke, de welke m[ceester] Jan Buucs knape is, hoe in tiden voors[creven] Heyne dede, ende zeyl[de]^a verre mitten andren in die zee op die avonture van gode, ende gheraecte te comen voor een voorland, dat men heet den Schilt, in Engheland. Daer vernamen zy al vaste bi den lande comende gheseylt drie schepen, die welken wesen wilden tHul in Engheland, zo dat die voors[creven] Heyne ende dandre mit naerste tot hem zeylden om te weten haer liede staet ende meynen, ende vernamen, hoe si teeken van den Enghelschen op haer liede mast ende op hare scepe staende hadden, ende waenden aen hemlieden veylich ghesproken hebben om alle maten te weten wat zi spraken ende riepen. Si zweghen al stille ende worden schietende sterkelic mit bussen ende mit allen haren andren rugienen^b, want zii zeylden staphans an hoor boord, de welke hem lieden te diere warf vechtender hand van haerre boord sloeghen, ende moesten hem lieden wiken mit die groten scade, die zi hadden in die scepen van doden ende van ghequetsten, ende ooc omme dat zi mat ghevochten hadden. Ende als si hem hadden gherust ende verversch, doe zeylden zy anderwarf and boord and minste scip van den drien, wt den welken die viande ghevloen waren, zonder twee manne, in die meeste schepen, so dat zi dat scip een^c grepen, ende schieder mede van den andren tween schepen. Ende als zy of waren, namen zi die twee liede over ghevanghen, ende vraechden hem lieden om den staet van den anderen tween schepen. Up den welken zi verandwoorden, dat dat goed Enghelschen toebehoorde, ende die cooplude van Engheland, die in den schepen waren, ende ooc die scepen van Engheland, ende al waert, datter enigherhande Oosterlinghe in waren, die waren woonachtich in England, also si selve zeyden. Alle maren ghehoord, zo was over een ghedraghen, dat men zoude dat minste boodkiin mit viif mannen zenden aen hem lieden, vraghende ende biddende, een warf ende ander warf, om Gods willen, of zi enigher vianden goed inhadden jof vianden, dat si dat over gheven wilden, altoos behouden vrienden goed ende haer lieder vrecht. Waer op zi verandwoorden, dat zii niet doen en zouden, no meenden te doene om den achtersten man te laten, die si in haren scepen hadden, ende riepen tot onzen kinderen: Croden kindere! Die dievel spie di, Vlamming! Com hidder aen ons boord ende haelt der Enghelscher goed! Mittien worden zi op Heynen ende op zinen lieden schietende ende schoten zeerre dan zi te voren ghedaen hadden. Daer maecten Heyne ende zii ghezellen enen moed ende zeylden ander warf an haer liede boord. Aen hem lieden wesende, zo scoten zi tvoors[creven] Heynen ghezelle, meester van den anderen schepe, dat hi quam van live ter doot, ende veel andere zine ghezellen, alsoet bleec, so dat hem die voors[creven] Heyne ende zii ghezellen alze verweerden, dat zi haer meester worden vechtender hand. Doe quamen die Frans[oysen] ende wilden se doot gheslegghen ende over tboord gheworpen hebben. Daer beschud men se ende worden ghebrocht binnen den Zwene van der Sluus. Doe quam m[ceester] Jan Buuc ende aenvaerde dat voors[creven] goed tot miins gheduchts heren behoef voors[creven] ende tot zinen behoef als vianden goed, also men wel

a) zoyde L.

b) Lies engienien?

c) dat scip een = een dat scip, fiat ene scip.